


Mi compromiso cu Aruba!

Polis nan compromiso pa haci di Aruba un lugar sigur pa nos turistanan y nos localnan



ORANJESTAD (AAN): Cada un di nos tin un compromiso cu Aruba, principalmente cu nos turismo, pero sigur den e diferente areanan unda nos cada uno ta activo. Manera ya ta conoci, Aruba Tourism Authority (ATA) ta expandiendo e campaña di conscientisacion y motivacion. A lansa e etapa nobo di e campaña di conscientisacion na cuminsamento di september cu un bista den e bida di algun individuo trahando riba diferente tereno den nos comunidad. Polisnan Melony Visser y Eduard van der Biezen ta destaca den nan compromiso cu Aruba y ta comparti nan experiencia.

Melony Visser ta un agente di polis trahando cu Cuerpo Policial Aruba pa varios aña caba. Diferente circunstancia a pone scoge pa e bira polis y esey ta algo cu e ta masha contento cu. Den su labor diario e ta topa cu hopi hende y ta anda cu diferente situacion. Actualmente, Melony Visser

ta trahando na Warda di Polis na Noord cu ta conoci como un aerea druk.

“Bo tin cu conoce bo bario manera bo plant'i man. Semper ta leuk pa wak e diferencianan, unda ta mas druk, ora luganan nobo ta habri etc. Esey ta loke mi gusta”, el a bisa. Un anecdota memorabel cu e ta corda, tabata na 2007, ora cu el a inicia e opleiding y su klas a sobrepasa hopi obstaculo. Melony Visser ta expresa, cu ora cu su klas a gradua y cu el a mira cu tur e 15 persona cu a cuminsa nan estudio ainda tabata hunto tabata algo hopi bunita.

E criticanan pasobra e ta hende muhe polis no ta afect'e. E ta enfatisa cu esaki ta un cuestion di actitud. Tambe tin di haber cu e manera di papia y con bo ta acerca un persona.

Melony ya caba ta preparando pa fin di aña, cual ta conoci pa un temporada ocupa. Sin embargo, e no ta

wak esaki como algo diferente na otro temporadanan den aña. Akinan su deber ta pa sirbi nos comunidad y yuda otro personanan cu por ta pasando den algun inquietud.

Pa e temporada di fiesta, polis ta traha mas oranan overtime compara cu henter aña y nan ta pasa te hasta 16 ora sigui na trabao.

Melony Visser hunto cu Eduard van der Biezen ta traha hunto den e ‘Fiets Afdeling’, caminda durante cierto cantidad di luna nan lo hiba control durante caminatanan, den area di hotelnan. Esaki cu e meta pa polis ta visibel eynan y pa yuda e turistanan.

Relaciona cu e trato na e turistanan, e ta laga sa cu e turistanan ta hopi contento cu e trato cu nan ta haya di polis. Naturalmente e ta lamentabel ora cu tin cosnan ta pasa cu e turistanan durante nan bishita na Aruba, ora cu nan privacidad ta worde viola y nan ta bira victima di ladronia of vandalismo.

“Tin cierto cosnan cu nos no por cambia facilmente. Un cos cu sa hunga un rol hopi grandi ta e consumo di alcohol. Turistanan ta sali y bebe un tiki di mas y ta keda den e bista di e malhechor. Nan ta bira un objetivo pa e malhechornan”, e ta indica. Na otro banda, un situacion cu e polisnan ta haya basta fastioso cu tin na Aruba, ta e bebemento den parkeerplaats den e clubnan y algun restaurant banda di e hotelnan. Esaki sigur ta un mahos bista pa e turistanan.

“Den e trabao cu nos ta haci, tin hopi cos cu ta cay bao nos responsabilidad. Mi ta haci e trabao aki cu hopi orguyo. Mi kier yuda esun cu kier ayudo. Turismo pa mi ta na prome luga”. “Mi compromiso cu Aruba ta pa haci Aruba un luga mas segura. No solamente pa e turista pero pa e Arubiano mes cu ta biba akinan”, Melony Visser ta expresa.

Eduard van der Biezen, colega di Melony Visser tambe

ta traha den ‘Fiets Afdeling’ y ta concentra su trabao den e area di hotelnan como tambe den e barmen cu ta pafo di e area ey. “Mi gusta un trabao cu ta hopi activo, vooral awor cu nos ta e distrito mas druk door di e clubnan nocturno cu a habri y pa e cercania cu e hotelnan”, e ta bisa. Van der Biezen tin 5 aña den Cuerpo di Polis. “Mi ta un role model y mi kier haci tur cos drechi, corecto. Tur hende sa cu bo ta polis y bo tin cu djis comporta bo mes”. el a agrega cu tin momentonan caminda nan tin e deber di defende nos isla. Esaki tin di haber cu e casonan di joyriding y ladronia cu e turistanan tambe ta pasa aden. “Bo tin cu purba di consola nan y toch mustra nan e parti positivo di nos isla”.

Kico ta un dia normal di trabao pa un polis? Segun Eduard van der Biezen no tin dianan normal. Tur dia ta diferente. Tin dianan tranquil y otro nan caminda nan no ta haya ni chens pa come.

E dianan druk ta cuminsa den weekend, for di diabierna ora tin ‘happy hour’ y ta caba banda di 10’or di e siguiente mainta. “Den e dianan aki ta basta tranquil door di e accionnan preventivo cu nos ta hiba”, e ta indica. “Mester di hopi positivismo den e trabao aki”. Eduard van der Biezen su compromiso cu Aruba ta pa brinda servicio y seguridad, na turista y hendenan local. Esaki segun e, ta e aspectonan fundamental cu ta den nos comunidad.